

光緒山西通志

名宦錄十一

錄一之十一

山西通志第一百十一

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

守令

嘉慶至光緒

郭晉雲南河陽舉人嘉慶元年知陽曲縣慈祥仁厚民感其
惠洵升太原府知府

劉斯裕南豐舉人知陽曲縣清勤自勵無廢事無冤獄洵升
太原府知府

鄒樹甯四川人知榆次縣廉公有斷才民皆悅服因辦差罣
誤落職士民條陳政績叩閣請留

特允之得發實復職後遷朔州卒於官貧不能旋里縣人感
其德捐貲爲賻輦輓歸焉

陳履和字介存石屏舉人知太谷縣學贍才敏勤於吏事判狀日數十觀者無不服其明允未旬月滯牘爲清縣人多販鴉片牟利履和率商民爲文誓城隍神禁之終其任無犯者修鳳山書院刊定條約課士手披口授循循然若師詔弟子工書人得片紙皆寶貴之蒞事八月絕奔競抑豪橫政聲大著母憂去士民泣送之有走懇省院乞留者

佟謹思豐潤人以進士知徐溝縣勤政愛士吏畏民懷善政多端不可枚舉

韓輝會稽舉人嘉慶十年知襄陵縣值歲饑勸紳富輸貲得一萬數千金設法賑恤民賴以蘇修汾河石隄百餘丈縣人勒石誌遺愛焉

趙大經德州舉人知襄陵縣勤吏治有幹才吏民畏服

周怡祖臨桂人以進士知襄陵縣爲政廉明重修書院振興文教

魏元煥昌黎人以翰林改官知洪洞縣氣度春容才堪肆應時當川楚軍興羽書絡繹供億猝辦無少缺學宮久圯捐貲修之城南聚瑞橋爲澗水所鬻復籌修如故凡有興作毅然任之至接士大夫謙和有禮在官九年報最遷去道光末仕至刑部尙書

顧玉書字蘭汀長葛進士由翼城調知太平剛介廉明愛士恤民修建書院文風丕振嘉慶甲子乙丑歲大稔額請大府賑濟民困以蘇其在翼城亦以教養爲務兩縣士民皆頌德不衰云

閻亮閣字翼天府谷進士知翼城縣治事勤敏處身儉約夏

山西通志卷一百一十一 名宦五十一
一葛冬一裘終日坐堂皇不少懈時或下鄉問民疾苦從役
三五人遇有爭訟立判遣不復再拘民稱便焉於地方惡少
匪徒嚴加懲創上官檄行之事有不便於民者亦未嘗曲從
也有祠在唐侯祠之西偏

王莘槐鎮洋舉人知岳陽縣簡易鎮靜能以禮化民

丁公路字禮門湖南甯鄉進士知岳陽縣丰姿卓邁歷事精
明善屬文公餘輒至書院集諸生講授縣之文風翕然丕變
遷知平遙一時以儒吏稱之著有山右詠古詩行世

周悌青陽人以進士知鄉甯縣清簡絕俗慈惠愛民博學工
詩尤善章草不自珍惜有求書者輒賂小吏以箋若扇雜案
牘間悌見之便欣然停判立書亦不問所從來也其風趣如
此在縣十八年與士民相習若家人父子遷汾州府同知去

卒於官

周壽椿字六泉嘉慶末年知蒲州府博學能文尤好獎勵人材捐廉葺修文廟並河東書院增設膏火以惠士林

金泳清苑人署臨晉縣嘉慶九年大饑仿前令呂東表之例開常平倉得粟若干石又勸紳民量力輸助各處設粥全活甚眾

李連夢趙州進士知虞鄉縣清慎愛民多惠政其題堂柱語人多傳誦以爲有父母斯民意

王元樞寶甯舉人知襄垣縣和平渾厚訟息民安作養人材士風丕振調署陽城甚著政績民祀之賢侯祠

劉樾綏德進士知長子縣臨民治事不尙虛文實心實政浹洽一時嘗補葺文廟續修邑乘闡義學書院優其月餼力行

保甲法事集而民不擾丁糧未盡歸地畝者悉詳請攤歸至
今民猶受其賜焉

崔榮大名人由副貢知潞城縣練達吏事興利除弊如恐不
及獎進士類聚諸生時與講論嘗於書院建文昌祠甫落成
芝生於棟喜曰此瑞徵也作棟芝賦以記之明年郭太守承
恩果以高第膺館選繼以靳觀察會昌皆平昔賞識者也縣
人以爲美談

唐鵠灌陽舉人知屯留縣丰裁嚴正聽斷公明以縣歷年苦
於雹災依古制創立藏冰事宜

汪勳安徽人知壺關縣重士愛民一政一令悉愜輿情其大
者裁贏樞禁包納捐書院經費於嘉惠士林之事尤拳拳焉
徐希高德慶舉人嘉慶元年知孝義縣每遇爭訟必先諭導

令其自悔往往不煩聽斷而去慧林寺有田三百畝已爲上官斷歸西河書院屢抗稟爭回爲縣書院經營之始

邵杞仁和舉人知孝義縣明敏果斷勤於課士繼徐令卒成書院度地鳩工規畫甚力

張煥光襄城人以進士知孝義縣渾厚精明案無留牘遇士之才者輒招致署內盡心教育多所造就

祝德全字午橋直隸人由翰林改官文水調介休廉明公正人不敢干以私勤於聽斷案無留牘嘗修繕城垣工鉅而民樂趨稱爲鞏固遇旱步禱縣山甘霖立沛蒞任二年政平訟理升潞安府同知去

宋竹苞河南舉人令平遙循聲流播政蹟無考喬廷駱者亦洛人有禮賢重士之稱以拔貢任

楊霖川武昌進士知平遙縣政尙寬大不以苛察爲明而事無或墮創修古陶書院獎進士類勸課有方

杜庭珠秀水人以蔭生知臨縣除積弊恤困窮政簡刑清民無冤獄羣感其德爲立祠樹碑

嚴遂成烏程進士知臨縣裁革夙弊鼓勵人材士民咸德之姚維藩字函青以翰林知石樓縣學術精純治績卓著愛民課士蔚有聲稱

王廷煥漢軍鑲紅旗人嘉慶十二年知澤州府禱雨有神應人以活龍王稱之一夕城北樓火起合城皆驚廷煥扶案祈禱卽時大雨滅火尤傳爲異因祀之五龍宮今遇旱猶並禱焉

門祥麟甯州舉人知陵川縣清節自勵遇事不便必爭於上

官輒作束裝之狀嘗曰吾十八年校官至此久安淡泊不畏
謫也卓著廉聲

羅濟溫江舉人知陵川縣恩信素著值滑縣之變大府駐軍
太行濟率士民親守隘口遏賊西竄之路以積勞卒

張儲字裕山潼關人嘉慶五年知大同縣古雅儉樸爲治無
赫赫名而至性至情久益與人相孚卒於官士民相與悼惜
祖奠者徧及途野

劉斯裕字芝厓南豐人以進士知大同縣善決獄名譽甚著
調陽曲去尋由霍州牧擢守大同府未任復調太原甫兩月
卒於官時論惜之

吳德輝華亭舉人嘉慶二年知右玉縣政尚寬平每治獄先
釋株連民懷其惠嘗承審重案歸而歔歔竟夕不寐其婦問

山西通志卷一百一十一 名宦十一
之曰一案於法死者甚眾吾求其生當獲譴故不決耳婦曰人命重矣能活多人一官宜可輕蹶然曰有是哉竟以失入墨吏議去其後民思之不置相尸祝焉有專祠在威遠堡馮駢駿字德驥德慶舉人知懷仁縣嘉慶四年調任壽陽遇事當興舉者一以誠意將之有儒者氣象修廟學建節孝祠頗情形家言有所建置時見祥徵鳴鳳塔其尤著者在任三年以親老乞歸士民至今稱之

費紹忠仁和舉人嘉慶九年知定襄縣既抵任案所部田賦及催督之籍歎曰襄民不勝敝矣乃定僱役之法清改充之弊免儲總之苦釐詭寄之戶均賦省役民有樂生之慶踰二年卒於官無以爲斂襄民爲歸其喪供遺像於縣社私諡曰

忠襄惠公

孫樹新浙之山陰人嘉慶中由舉人知代州下車卽興修學校星聚泉久湮爲疏濬之穿玉帶河與之通栽蓮萬本建亭其上人以爲文明之徵時州中科名不競嗣是果翮聯而起云開西鄉水利溉田萬餘畝修雁門關道以通行旅壬申歲履盡心賑濟州無饑人民感其廉惠爲建祠青龍泉歲祀之宋志徵河內舉人知五臺縣性子諒有儒者氣象待士以禮吏役不敢擾民能治盜獲巨盜郭保等枷斃之宵小斂迹嘉慶十一年京城有沙彌文之案沙彌文者賣藝人張某以醉槍傷內東華門值班護軍縛送刑部訊其姓名醉語模糊稱爲沙彌文問其籍貫詭曰五臺縣王家莊尋斃於獄部劄下山西查孛家屬志徵查縣屬有兩王家莊皆山僻小村無沙姓亦無在京賣拳捧者據實揭省已而省中委官五六輩分

路大索云標兵且繼發民大駭星夜逃亡入鄰縣有襁負嬰
兒夜行墜崖谷死者而雁平道趙文楷亦至志欲涕泣請曰
如此洶洶且釀變故縣境如有逆犯家屬請斬職頭以申
國憲文楷呼委員來叱責使歸卽以實報院咨部部尋查明
係直隸人姓張並無沙彌文之名案遂結在任十年引疾歸
沈潤芳嘉慶十二年知保德州勤慎明廉興利除弊緩征散
粟撫字心勞四境安謐因鹽案呈誤去士民甚惜之繼之者
爲周貽組亦以惠稱廟學自前牧湯師錫修建後規制未備
復新之

吳邦治固始進士嘉慶十二年知解州廉潔自持愛民重士
書院傾垣歲捐廉四百金興工閱五年規模復舊又如前積
資爲膏火費由是文教丕興士林感戴不忘

秦恆柄臨桂舉人由荷氏調任安邑縣創置公館補修城垣
廟宇官廨事成而民不擾以最升河東監掣同知

林英閩縣舉人知芮城縣以學行著敦崇節孝維持風化政
治一新

武告成遷安舉人知芮城縣慈祥爲政歲旱禱雨有應重修
風雨廟大興林芬亦以舉人任愛士惠民工詩縣中風土多
所題詠

陸棹字香嶼浙江山陰進士知平陸縣爲人端嚴純靜撫眾
以慈興水利課諸生教養兼盡乙亥九月地震水沸山崩牆
屋傾圮歷斃人民三萬餘口災黎露處無室可歸呼號悽楚
之聲哀鳴遍野棹沿村撫卹揭狀上臺省奏發賑款親赴四
鄉量災散放又值隆冬風雪殘黎饑寒交迫而地震仍累月

以民元卷一百一十一
全卷第一一
不息死者相續樟晝夜奔馳自傷無德致此慘毒自縊死百
姓悲哭如失慈母數十年後父老語及猶有泣下者道光中
邑令吳逢甲據民情詳請大吏於傅巖書院之西建立專祠
春秋致祭焉

陸洪雲州人嘉慶五年以拔貢知垣曲縣作養人材興利除
弊免蔬菜之供及支應雜差西關皋落王茅二鎮皆勒石以
記之卒於官

鄭燧玉屏舉人知絳縣勤己愛人政多慈惠下車適值洊饑
四境蕭條燧卽捐俸施粥上請賑粟下勸購贖閭邑感德樹
碑頌之

薩弼圖字輔齋滿洲人嘉慶十四年知隰州德政甚多去任
時士民攀轅臥轍幾不得行至今頌其遺愛

藍瑛字書屏崇安進士知大甯縣學富才優政平訟理公暇課士口講指畫六年不衰

恆山字松岩滿洲人嘉慶五年由廣平通判升知霍州仁恕清廉士民愛戴以憂去州人哭送者填塞道路

崔惟允甯河舉人由苛嵐遷知霍州潔謹自持愛民如子其下化之風清訟簡

陶廷慶貴州都勻人知靈石縣東河堰爲胡令所築砌石重修之城免水患民勒石志之號陶公堰

右嘉慶年五十四人

又三人
附見

文壽華鬱林進士道光五年知陽曲縣廉明慈惠庭無冤獄邑苦差繁稟請以軍差協濟車馬屬他州縣民困少甦邑北境連年旱蝗親身督捕蝗不爲災升霍州知州

宣麟吉林人以恩貢知陽曲縣精明廉幹案無留牘約束胥吏嚴緝匪徒凶頑斂迹地方肅清歷宰臨汾岳陽諸縣並著政績有能吏名升平定州知州捐廉修嶺西石路行旅惠之新廷鈺字謙谷靈壽舉人由崞縣令調知陽曲性嚴明紀綱肅整民間利弊無不洞悉決獄如神尤善治盜力能挽兩石弓所至胥囊發篋者聞風遠遁既任首邑趨公之暇卽治民事遇上案中人發縣羈管者非要犯概取保釋時奄至繫所詢有濫枉及蠹役私虐者皆爲辨別窮治之以最擢保德州歷署甯武朔平知府卒其所履縣若臨晉太平平遙沁水興嵐及崞並著循聲多祀入名宦云

顧麟趾臨潼人以諸生援例授知縣歷宰壺關孝義調繁榆次持躬廉潔蒞官嚴肅所在市井無賴聞風斂迹尤長聽斷

明察若神布商陳某設肆鳴謙鎮夜被人殺失布數匹適其子襪有血痕又素遭蕩嗜博父訓之輒惡聲相向數日前方以忿爭颺去眾證其行逆子畏刑亦誣服麟趾終以盜物爲疑姑繫之而遣人物色布匹得於鄰村典肆究治主名蹤迹至歸化城獲之一訊而獄具時上官方以逆案久懸嚴檄日數下至是乃歎服著有山右獄獄記行世三縣民多喜稱述云

孫銜字子丹富陽進士知太谷縣剛明廉正人不敢干以私下車修學校新忠義孝弟祠嘉獎士類其才者厚資以勵之舊例縣有協濟平定州車馬州爲入晉首銜徵發不時民甚苦之銜力請於巡撫申自兵差外概免調發以紓民力鄉俗父母喪必衰絰踵親族門拜跪謂之報死或舅家藉以恣索

孝布衞爲文禁之陋俗遂革在任六年戢暴安良刑清政舉被議去送者盈路至有泣下者

賈聯芳字棣堂鄆縣舉人知石樓縣河岸窩匪號刀客久爲行旅患聯芳擒斃其魁遠近頌之調交城前令黃樹寶嘗建卦山書院經費闕如聯芳至始竭力規畫集諸生延師課之優其月俸文風爲之一振以治行最升霍州知州縣人稱其政績與屈令筆山先後媲美屈亦秦人創設養正書院者也乾隆中以進士任

周國頤安岳人知榮河縣調徐溝廉勤愛民政平訟理一時有慈母之稱善書尤精於醫求診者嘗盈訟閣一視之去官貧不能治裝百姓資送回蜀

劉廷璐天津舉人道光七年知洪洞縣吏治勤能修舉廢墜

學宮偶圯倡捐興復爲文以記城南皋陶祠規制宏整亦所
重葺也

鄭秉恬字雲壑江西上高人壬午一甲二名進士以編修改
授五寨知縣調繁曲沃盡心民事而不肯結納上官釐奸剔
弊地方肅清以其暇修城講武十五年趙城之變列郡戒嚴
而曲沃守備素繕民恃以無恐遭憂去未幾卒於家

崔光笏字正甫慶雲進士知鄉甯縣廉明清正撫字有方創
修鄂水書院講學課士文教大振父旭方令蒲縣鄰邑也光
笏久隨侍故於地方利弊洞悉政聲卓著一時以最調陽曲
遷代州知州終雲南兵備道其去鄉甯也後令某貪而虐盡
反其政火耗至加四有奇猶未饜征斂益苛民弗堪乘其下
鄉聚數百人襲而昇之郡城當事惡民之悍欲駢戮亂者光

笏時宰陽曲力陳激變狀山民蠢愚可矜祈免株連當事意解獄具遣戍二人杖徒五人而已民至今尸祝之

王逢壽知襄陵縣勤政愛民待士有禮縣中童試常八九百人舊假廟宇爲考地士苦湫溢弊亦叢生逢壽就書院前隙地建考棚十數楹編號局試至今賴之

陳維屏字劍芝江甯進士知浮山縣博學工詩修神山書院謀士愛民諸廢並舉縣人爲立碑頌德後知榆社亦多所振興李廷揚樂山人繼任浮山除莠扶良政成民和城內進士巷有碑紀其事

談素勳字默菴丹徒進士知岳陽縣富文學有清節爲政不苟民甚德之

傅承樾天門人知岳陽縣勤廉公恕抑暴扶良不避艱難不

俾權貴涖岳時年尙少所垂政績多經久不做雖老吏莫能及至今士民猶能道其已事焉

陳鼎雯字雨文定遠人由翰林知洪洞縣博學宏才吏治精覈縣童試舊無號舍鼎雯就書院建廣廈十餘間多士賴焉後仕至河南開歸陳許道

奎麟滿洲人知襄陵縣治邑有惠政尤好甄陶士類一時知名之士皆出其門

張兆衡字仲嘉武威人由翰林改知縣初令和順調曲沃革弊釐奸除地棍數輩民咸稱快東門內曠地久爲匪類所據乃勸眾捐資創建考院而書院並諸壇廟廡宇以次興修又增輯邑志典章文物燦焉大備升朔州知州

陳景會閩縣人由拔貢知洪洞縣治尙嚴毅豪強斂迹捐貲

修建聚瑞橋並城垣門樓添設書院膏火加意寒酸文風丕振擢知代州去

王筠字萊友安邱舉人知鄉甯縣正直廉明道氣盎然待士以禮遇民以誠丙午歲饑詳請發倉蠲賦籌款大修城垣以工代賑多所全活在官十年兩署曲沃政聲並著以老致仕未及歸卒生平湛深經術尤精六書之學蔚爲當代儒宗著有說文釋例說文句讀鄂宰四稿諸書行世

王熾字喬南益都進士知岳陽縣言貌古樸治理平和自奉儉約嘗以粗糲自給不忍累及商民簿書之暇詩酒爲娛課士論文壘壘不倦奉教者幾忘其爲長吏焉

德蔭字越亭漢軍正黃旗進士知汾西縣修城池興學校功德在民稱頌弗衰後官至河南布政使

駱光裕知襄陵縣重修河隄邑人爲立德政碑

周春陽鍾祥人以拔貢知臨汾縣諳習吏事安靜無擾咸豐三年賊犯平陽城陷自經以殉贈恤如例

崔偲霸州進士知永和縣多惠政道光初調臨晉勤懇一如在永和時嘗因旱禱雨有應修葺龍祠念城中地窪久雨則水無所洩因就祠旁濬大池發以輒溝瀆四通民免沈溺之慮且便澆濯其隨事期有裨民生類若此

廉九經字一亭廣甯舉人道光四年由夏縣調知臨晉有幹才發伏摘隱案無遁情張留村差役藉事擾民村中無賴黨附訖集多人九經聞之夜四鼓單騎直入其村擒首惡以歸立置諸法自是合境帖然修書院建考棚善政多端士民誦之弗衰

王有壬海甯人以拔貢知榮河縣刑清政簡視民如子每聽訟反復開導兩造或相讓而去遇必審結者立判斷絕無牽累舊例協濟永濟兵差車馬民往反羈候重困有王親率應役遇弁兵橫肆驛吏勒抑曉以禮法徐衛出境民感其惠愛之若父母然

卓熙泰廣西舉人知榮河縣剛正廉明嫉惡如仇訟師豪民皆斂迹鄉俗婦女或以小故輕生母家糾黨蹂躪無所不至往往有死一婦而破產者熙泰力矯之刁風爲一變去之日父老攀轅遮道馬幾不前

陳洪高瀋舉人道光三年知潞城縣性廉介無敢以苞苴及門者勤於聽斷事至立決咸服其平修學造士時以儒術緣飾吏治調高平去潞人思之不衰

張力卓湘潭舉人知襄垣縣政治嚴明豪滑斂迹興養立教
修廢舉墜政績多端

李士式朝邑舉人知長子縣爲政簡易案無留牘加意人才
月必集諸生講授孜孜不倦一時士氣振作多所造就

沈我皆六安人以進士令長子剛直端方遇事必躬親清慎
自矢訟至卽決吏畏威而民懷德以卓異遷官去

茹金陝西漢陰人以進士任壺關縣性仁恕勤求民瘼陋規
浮費多所裁革在職七年吏民無敢以私相干者嘗重輯縣
志時稱詳備

鄭謙字虛舟東莞舉人知屯留縣廉明仁恕作育人材文風
以興繼之者爲卓熙泰後調任襄垣陳景會後升代州並有
政聲

張柳南字星堂高密進士知屯留縣性純篤政尙寬而治盜特嚴爲守兼備有古循良風每單騎下鄉問民疾苦教以耕種紡織之法加意書院躬親講授士民悅服政聲懋著年餘卒於官聞者無不泣下所著栽樹法積穀歌小兒語人多傳誦

劉炳青蒙化進士知潞城縣縣東南境有茱蘭岩平順舊疆也險遠多盜前令以地接河南莫肯捕治久之益橫至掠人勒贖炳青至詢得狀一夕率眾掩捕盡擒其渠在官九年政聲大著暇輒與文士談藝葺廬山書院增置膏火一時科名稱盛焉內擢吏部主事

劉德操江西舉人知潞城縣性伉直不與時俗俯仰勤政愛民加意學校尊經閣其所建也遇士以禮無稍苛姦然不敢

以私干事有不便雖上官必斷斷爭之卒坐是罷斥去之日行李蕭然士民泣送之

楊從龍大埔人由舉人繼劉任仁慈平恕而遇事勇決巨細必躬親縣中童試舊假祠宇兩學士子恆苦暴露乃卽廟學東闢試院建號舍至今稱便咸豐癸丑奉檄調佐江南戎幕踰五年以功授知府銜仍復故任旋告歸縣人爲刻石頌德競爲詩歌以送之

孫曰庠仁和進士知襄垣縣寬和平恕嘗修學宮裁革里總浮費民惠之立碑以記

王繼賢黔陽優貢由內閣中書道光二十年知永甯州絕苞苴拒請託在任數年政平訟理當於署之西偏構室數楹親課士子退食之暇以書畫吟詠自娛每出勸農桑遇名勝必

遊覽題詠州人多傳誦之居九年卒於官

官听大興人知平遙縣值歲歉設法勸賑全活甚眾其後有

陳崑玉學問淵博陶成士類嘗修文廟德蔭滿州人繼陳任

亦喜宏獎折獄有剽斷才

劉敘道光末知平遙縣愛民潔己鋤莠安良整飭士習風氣

為之一變倡修城垣工未竣積勞而逝士民悲思報之以俎

豆焉

曹森上元進士知孝義縣懲惡甚嚴遇土棍必盡法懲治合

境肅然時東門低陷興修之其後有謝令者並修南門今頗

壯觀謝名逢昌臨邑舉人以廉稱

霍作明三水進士知臨縣慈惠清勤保民若赤適大饑遍歷

山嶺籍其貧者賑恤之多賴以全活遇旱蓬首跣足跪禱烈

日中甘霖隨注縣人建生祠祀之

丁宗懋禮陵舉人知臨縣公慎廉明民安其業補築城隍永爲保障士民作歌頌之

黃廷範字子山江蘇甘泉人由進士知臨縣廉勤有吏才民以訟至判決如流其嚴懲土豪矜恤苦節尤爲民所畏服磧口鎮爲河路要衝素多盜設法捕緝商旅獲安縣多川廣客民以墾山爲業歲少歉輒不靖悉按所居編入保甲孤村弱戶藉以無恐居三年政教大行以他事望誤解任士民奔走訴大府乞保留巡撫梁特允之會以疾卒

聶文炳字虎臣由副貢任臨縣慈祥愷悌盡心教養民以訟至必反覆開導非梗頑者未嘗輕下一笞也作養士子實行保甲惠政所及翕然悅服其勸民詩縣人多能誦之

祥玉滿洲人石樓知縣黜異端崇正學士頌愷悌民歌孔邇
繼之者爲何愚以進士任廉勤有聲賈聯芳後知交城縣亦
健令也並陝人

夏寶晉字玉延高郵舉人知甯鄉縣性廉介爲政平恕博極
羣書喜作育人材縣舊有鳳鳴書院廢已久復振興之並增
膏火士林悅服著有仕國絃歌錄山右金石錄及詩文集若
干種

萬逢時遷安進士知甯鄉縣勤於課士文風蒸蒸稱盛焉爲
政公正廉明卓然有循吏聲

傅德宜開元舉人道光中高平知縣爲治崇大體慎於用刑
振興義學文廟壇壝多所修葺

李貞木秀木進士知高平縣爲治嚴而不苟勤於課士增書

院膏火設賓興經費重葺廟學南濠及浚水橋亦其所修濬也後以疾歸

徐璈字樛亭桐城進士知陽城縣刑寬政簡一意教養倡資建文廟廓增舊制並製禮器文物稱備博學工詩縣中名勝多有題詠於忠節事蹟尤惓惓焉析城山草肥美平陽營馬爭來牧害民稼力爲禁絕忤上官不顧民德之爲立祠於山陰以祀著有詩經廣詁及詩文各集

強上林溧陽進士以庶常知陵川縣多善政嘗修城垣補水口定書院課程其創捐鄉會試川資三千金尤爲士子感戴以憂去任縣人建碑文昌宮以記德政焉

劉承寬陽湖舉人知陵川縣剛毅有爲除莠安良豪滑斂迹嚴禁婦女遊觀勸行蠶織捐復社義倉以備賑荒藉甚政聲

調安邑去

孫謙豫貴筑進士知沁水縣廉直慈祥愛民如子倡修文昌祠優給書院膏火獎勵人材孜孜不倦

譙厚光貴州進士道光十六年知大同府督屬有爲以興利除弊爲己任玉河漲發鬻及城闔修隄護之平市商限息調劑其盈虛緩急定爲每年三限商民稱便至今相仍以親老致仕歸

王格正密縣舉人孝廉方正道光十一年以知縣署渾源州性端謹明習吏治下車清積案革陋規卽恆麓書院立條規聚士講習政教大行明年秋霜災害稼穡民饑請於上官發倉賑貸復捐集粟米按四鄉定期分散而設粥廠於東關以收貧窮之無依者全活無算比去任復捐錢爲孤貧衣食之資

州民送者皆哭失聲尋知大甯以廉勤名卒祀渾源名宦
陳蓋蒼溪舉人知渾源州多善政州人立祠祀之

于吉中歸安進士知靈邱縣才具優長慈惠明決性好學博
極羣書修葺書院進諸生講授文教聿興歲值歉收貧民乏
食捐資賑撫並諭商紳士立平糶法以資救濟民賴以全括
者眾其他惠政尤多迄今士民猶頌德焉

蘇元弢交河進士知靈邱縣惠愛慈祥惟恐擾民倡捐書院
經費培植文風迄今賴之調交城去士民頌德不衰

紀瑛瑒獻縣進士繼蘇任寬大和平聽斷明決學問淵深兼
工詩賦時集諸生講授賞奇析疑孜孜不倦一時盛推其以
循吏而兼經師云

張集馨儀徵人由翰林出守朔平府道光十六年右玉大饑

設法賑貸民賴以甦關外數被蝗災稽祀典立猛將軍祠於風神臺並創建玉林書院優其月餼爲合郡士子講習資升任後士民追念不忘擬祀名宦

清安滿洲正黃旗人知朔平府廉潔愛民時微行詢民疾苦於閭閻之事無不周知姦宄屏蹤墨吏亦嚴憚莫敢肆擴修書院並設駐防義學俾旗籍子弟端蒙養之基他如開柳泉渠葺南關外石橋及風神臺皆有裨於郡治形勢調太原府去保舉道員望吏議以同知用尋卒祀朔平名宦

劉坦字竹樵知右玉縣張太守修玉林書院贊助之力居多加意寒畯多方獎勵一時知名之士皆出其門遇壬辰旱蝗率民力捕遊人多以蝗神蟲爲言者坦取而吞食以釋其惑駐防旗民素驕縱或走馬市衢遇縣令不避道一日坦出直

衝鹵簿立擒下鞭之曰我自打野百姓不知汝爲旗人也自此肅然在官期年政教大行豪民匪徒無不斂迹戕影及去士民餞送者盈道而旗丁亦壺榼相屬云

楊樹年富平進士知平魯縣縣自丁酉大祲之後戶口耗減市井蕭條勤勞撫字招集流亡時丁徭未攤歸地糧者尙千餘金民困征輸一丁逃累及一戶一戶逃累及一村賠累愈多逃亡益眾樹年洞悉其弊稟明大憲丁銀始盡均入地畝民困大蘇流亡者漸以復業調平遙去縣民臥轍攀轅者相屬焉

吳允輝湖北舉人道光十九年知榆社縣廉介絕倫歷任時年七十矣署內僅父子二人馭下甚嚴蠹役皆遠避與襄垣令卓熙泰並以廉吏名卓管再署榆社爲民所愛允輝實繼

其任期年以老乞歸

惠馨字怡園滿洲正藍旗人道光元年沁州知州賦性仁慈持躬清儉州爲路澤通衢遇有差務蠶役緣爲奸利時擾及民惠廉知其弊買馬贏自畜以備民以訟至必多方曉譬遇必當對質始允傳審未嘗聽胥役稍有株連民咸稱之曰老家長蓋尊親之又以其悉知隱微若家至而戶履也去之日攀轅者盈途並祀木主於俞公祠內

賈亮采高郵人道光二年以進士知平定州學問淹博以栽培人材爲己任精於鑑別所拔識者後多宦達

文光字星槎漢軍正黃旗人以廉正稱亦喜文學嘗捐俸修書院考棚課士甚勤

王繼蘭字秋畹濟甯舉人知平定州居官簡易便民每有興

舉皆事立集而民不擾屢辦兵差力不及請用協擠令民出
驢以應之設法更爲簡便

錫麟字經初滿州正黃旗人知平定州敦厚愛民嘉河經城
中時爲煤渣淤塞兩岸居民每受水患倡捐置地二百餘畝
以所入租課爲歲修經費畀紳士董理之

郭書俊濰縣舉人令孟縣宏獎士類痛懲匪徒御下甚嚴每
治獄胥吏不敢旁參一詞用是民安其業薰於善良無梗化
者

鍾汪杰字元甫嘉善進士知壽陽縣才高學博能以經術飾
吏治聽斷敏捷音如洪鐘奸匪望而生畏然慈惠性成未嘗
輕施笞朴縣當衝途道光五年回疆用兵供億浩繁不以累
民十三年大旱米價騰踊爲立法平糶貧民多賴以濟每遇

旱災虔禱多應狼爲患爲文祭城隍驅之患亦息嘗集文士立社課其地有嘉禾五穗人以爲文明之祥在官八年政治民和升朔州知州去士民祀之文昌宮之遺愛堂堂舊祀明知縣藍公初教民織者也

王晉介福山舉人知壽陽縣嘗令芮城重士愛民甚有聲譽及履縣勤廉明決御眾以寬而於蠹役盜賊嚴峻不少貸修葺城垣以及衙署凡所興作皆親行規度期久遠不視官爲傳舍循良之聲著於一時卒於官縣人思之亦祀之遺愛堂以配藍鍾二尹

李鴻峙字小嵐歷城舉人知孟縣蒞任公廉不苛勤於政治往往夜攜幹役潛出巡察或遠至二三十里徹曉乃歸由是奸徒聞之無不悚懼尤留意人材課試書院與諸生講論弗

倦其才者優賞獎勵羣奮於學戊申夏大旱率紳民步禱藏
山一晝夜往反八十里歸途甘雨隨之時以爲至誠感召云
廖翺字雨臯南海進士道光八年知定襄縣平易近人政暇
輒青衫葛帶遊行阡陌與農夫閒話問所疾苦或延見耆儒
秀士詢以地方興革事宜用是裁陋規寬徵比專務德化非
治盜賊未嘗輕施笞朴也嘗繪節儉圖以正民俗刊易知單
以防吏弊遇歲凶民饑廣興營建以工代賑邑無饑民在官
十餘年百廢並舉鄉試連與分校時稱得人後因事被誣死
縣人哀之私諡曰恭愍

王恂大荔進士除定襄令學識核博清慎愛民專以崇教敦
化爲務文廟規制未備增修之凡事有關風化必竭力舉興
民樂其政職滿擢升朔州知州百姓惜其去攀轅臥轍者相

屬於道馬爲之不行

李廷揚樂山舉人道光中知代州廉靜不擾撫羸弱尤有恩聽斷必委曲曉解未嘗輕施笞朴歲小歉捐俸設粥廠興工修城令貧民得執業以取食焉民至今德之

張大業字梅岑連州進士知五臺縣性仁厚有操守太谷孫某者家巨富起新宅聞五臺山有白石採購之一石駝以兩畝運費至五十金五臺惇縣之人有曾在京師辦石工者謂青白石非宮廷不準用訟孫姓僭越干例禁大業查例批駁謂五臺雖產青白石白石無例禁明文訟者乃赴太谷具控太谷正署兩任行文移查大業以前批覆兩任得賄萬餘金爲之消弭而訟者未廢又控於按察司司檄五臺查覆大業仍以前批上案尋批陽曲縣縣索賄六萬金令孫姓兼賄訟

者案乃結後行賄事發巡撫阿勒濟阿嘉大業之有守調陽
曲縣尋升代州卒於任

李衡廣西義甯舉人知崞縣廉明多惠政已支差向由胥吏
傳車滋擾頗甚衡設局延紳董之閭閻以安又捐修原平義
學普濟石橋凡利民者次第修舉邑人勒石紀之

林德奎懷遠舉人知繁峙縣值歲饑勸民賑貸計口授粟全
活甚眾

楊作梅字庚山濟甯進士知五臺縣清廉明決彰瘴判然詞
訟一訊卽結案無留牘胥吏惕息不敢爲奸士民欣欣樂業
凶暴者不敢侮善良猾賊皆逃鄰縣民間夜不閉戶遇命案
驗畢得正凶其鄰證立即開釋不株累一人在任五年調陽
曲縣去升河東監掣同知尋卒

張思鏗字金堂上饒進士知崞縣爲政寬嚴相濟吏畏民懷
捐廉益書院膏火溶隘開溝瀆在任三年輿情允洽以卓異
調陽曲升河東監掣同知澤州府知府嘗歷署洪洞鄉甯所
至有循聲終四川按察使

吳其均字南池固始人由副貢知繁峙縣有幹濟才爲政務
行實惠規畫久遠不辭勞勩尤留意文學甫下車卽取志稿
潤色付梓時科名久不競乃移建書院廣立社學暇輒與生
徒講授疏龍岡水導其流曲環城南築長隄種樹其上嘗曰
樹人如樹木三十年後木成陰人文亦蔚然矣調任大同劬
瘁強簡刑獄力興教化與民休息修玉河隄並於城西北築
堰以遏山潦徧栽樹以固之尋卒於官今兩邑青林蒨蕚民
以比之甘棠云

姬泰聚字星亭裕州進士知繁峙縣爲治安靜無擾熟悉吏事而不以明察爲能訟者至以理論遣久之民亦無梗化者在職二十一年清苦如諸生調廣靈遷潞安同知卒

莫兆文字昌廷定海舉人道光十七年由永濟知縣擢保德州慈惠愛民教養備至創建書院義學裁革魚課炭行興利除害善政多端工詩善書兼能四體人爭寶之有自刻法帖行世卒祀名宦

周啟柏字石苔金鄉人知河曲縣操守清廉聽斷明敏創建厲壇修明典制尤愛才嘉惠寒士貧不能讀者時給以膏火資人多尸祝之咸豐初以憂去四年在籍遇難一門殉節啟柏故由父難蔭授官至是

朝廷以再世忠貞議加蔭恤竟無嗣

徐麗生字石溪武康舉人道光九年知解州清節自守嘗語人云作官能不愛錢自能愛民牧解十八年民不擾去官囊無餘貲

周師陸涼州人由翰林改官安邑知縣振興書院多士景仰劉端侯官舉人知安邑縣忠信明決案無積牘調補鳳台知縣

俞鎔婺源人知安邑縣廉幹有聲盡心民事邑當孔道供應車馬里民苦之因請道庫發池脚津貼民力以紓邑城西寺北村訛言仙姑降男女雜集禮拜舉國若狂甚至託神媒強婚責備厚匱無敢違忤者鎔馳往枷杖社首封鎖其廟眾惑始解後升雲南阿迷州知州紳耆願諸臺省得奏請以直隸州仍留山西

胡兆松大興舉人知夏縣性寬厚多惠政創建考院士子賴之其後有玉山王黻以進士任設西門外義園會稽會文炯以舉人任嘗建修各壇廟皆以忠厚愛民爲縣人所思

張穎元黃岩舉人知平陸縣丰裁峻厲不諂不瀆向時考棚經費新生攤解穎元裁免出俸貸之至今人猶頌德焉

符壯圖饒陽拔貢知芮城縣才具素優廉能清正前令福山王晉介倡修書院未竣工去官壯圖踵成之

張舒翰永豐進士由翰林改芮城知縣恤民禮士寒峻多有被其澤者值丙丁歲荒災民漸肆擄掠嚴飭緝拏盡法懲治其風始熄並設法賑濟民賴以安

張濤順天副貢道光二年知絳州性仁慈於獄囚每加意矜恤修養濟院立城北義冢惠政在人久而不忘

陸廷樞字鎮堂絳縣知縣行己治人一以誠敬爲本下車後
禱雨輒應歲有蝗亦不爲害

李仲祁清苑進士知絳縣振興文教多所造就邑人感德勒
石頌之

毛鳳儀貴筑進士知垣曲縣重建書院盡心課士折獄明決
案無留贖調芮城去

田豐玉瑞昌進士知垣曲縣勤於課士誘掖獎勸改建崇德
祠扶立循良義舉諸碑又修造大堂邑人追思焉

晏宗望含山舉人道光末知垣曲縣廉潔仁慈鋤強獎善時
以經術飾吏治有古循良風咸豐三年粵匪北竄城陷宗望
冠帶坐公堂撫膺大慟曰不能保守城池死吾分耳奈百姓
何賊不加害罵愈厲遂殺之旌卹如例祀忠烈祠

汪和字雲叔儀徵舉人由榆社知縣調河津性慈祥學問淵博在官多惠政尤重人才每集諸生講授勵以讀書立品士爭砥礪以赴所期以病去同治中復任手輯志乘刊行之周貽組臨桂進士道光四年由保德調知隰州愛民課士勤慎自持一時有循良之稱

張煥光字文燦襄城進士道光十年知隰州重修書院並增膏火時勤考課士民思之不忘

丁德泰名心逸以字行大治進士知大甯縣軫恤民瘼視如赤子剔弊數端及去士民爭製錦以送之

楊延亮長沙人道光元年以進士知趙城縣博學有幹略愛才禮士勤求民瘼於邑中書院義學水利驛務多所振作山東匪徒曹順潛居縣之耿峪傳習邪教謀爲不軌時延亮已

山西通志卷一百一十一
三
升安南州知州矣訪聞將捕治爲所偵知卽夕糾黨入城焚
燒衙署延亮死舉家燬焉事聞

詔依知府例給卹建專祠

賜諡昭節

右道光年一百五人

又六人
附見

高松年順天舉人咸豐四年知文水縣行止端嚴性情慈易
學道愛人有古君子風宏獎士類加意培植時捐廉俸爲師
儒講習資調甯武去猶以未及振興書院爲憾

孔廣泉蕭山進士知交城縣縣協濟平定驛務值軍需方殷
徵調無時民困於役力陳於太府改折銀兩積弊始甦在官
十年多善政民建祠祀之

黃宜之字義門舒城人文水知縣到官值旱荒盜賊蜂起嚴

行保甲設法捕治仍不時親履各鄉匪類聞而斂迹四境安堵夜不閉戶又因書院有名而無實倡捐經費嚴定課規迄今賴之

林本象字愛庭四川選貢繼黃任諳練政治省刑恤民蒞任甫卅月清積案數十人稱明允興利除弊凡便民之事行之惟恐或後尤注意文教肄業書院者至舍不能容迄今士林頌德弗衰

何維垓字曉楓金州廳舉人咸豐元年知平陽府性毅嚴不苟言笑遇事持大體而練習吏治聽斷明決無稍依違三年八月粵逆陷垣曲時平陽總鎮烏防守太行盡以兵行警報至檄之歸不應惟激勵商民爲守禦具部署甫定賊已破曲沃長驅抵府城矣維垓以東關必爲賊據自當之賊併力來

攻架礮轟擊守者驚潰城陷遂遇害全家死者三十餘人惟三子喬壽就縊未絕遇救得免事聞贈卹如例建專祠世襲雲騎尉

朱次琦字子襄南海人以進士知襄陵縣明敏慈惠能以儒術爲吏治臨汾民與縣人爭平河水利久不決次琦會臨汾周令履畝勘驗定以地隨糧以水隨地之制修改渠規防制加密兩縣人皆服其平甫半年乞疾歸性好學熟悉掌故方筮仕來晉值套部蒙民構孽其王謀盡逐漢民之佃種者畝洶洶大府檄次琦往治之次琦援故事曠以大義羣奉約束惟謹既歸里隱居教授粵中奉爲大師門下著錄者常數百人著述甚富年逾七十悉焚之光緒中卒

丁璜字礪溪黃岡人由進士歷宰左雲萬泉有聲癸丑四月

調曲沃籌捐餉辦團防諸務方興驛站首滅差徭省民財以
巨萬計將藉其資爲守禦具事甫定而賊已逼城陷正襟坐
堂皇賦絕命詩一章賊蜂擁至據案大罵賊攢刺之垂斃猶
顧曰殺吾可矣勿傷吾好百姓一時家丁楊誠等九人俱從
死事聞優卹加知府銜世襲雲騎尉建祠祀之

劉登雲興國人由拔貢知襄陵縣明敏有幹才粵匪陷平陽
守令俱殉難登雲奉委兼攝臨汾早去暮歸匹馬往返弔死
慰生擒土匪瘞殘骸旬餘日百事並舉而襄民之以訟至者
仍聽決如常也後調平遙值歲歉多盜又俗好蓄鴿多者以
萬計損人禾稼登雲至嚴緝捕立罰規一縣肅然民爲勒石
紀其政蹟

蕭大成字立齋納谿舉人廉明剛斷遇事敢任署岳陽縣適

髮逆犯境防堵有方土匪乘閒將行肆掠治以極刑閩邑帖然無騷動者民感焉爲立坊頌之

郭定生臨榆舉人知洪洞縣廉明樸素慈祥愛民鄉閭分校者數次得士甚盛後以催科不及去官閩邑紳民訟寃保留爲例所格後事白改任榆社地號瘠苦安之若素歲小歉不忍敲朴仍以下考被劾歸

沈熙齡字芋士歸安人以優貢知太平縣才性明敏勤於治事庚申大雨傷稼發倉賑恤窮黎咸懷其惠

徐炳華字仙九安肅人知翼城縣爲政不苟處已廉潔縣徵糧舊歸銀鑪經理火耗平色花戶每以抑勒爲怨炳華廉知其弊盡裁之聽隨時估價易錢完納民甚便之

岳玉溪利津人咸豐末知永濟縣剛正不阿節儉愛民陝回

倡亂沿河防兵屯集調度有方供億辦而民不知擾會旱蝗
禱於神步行烈日中受暍疾卒民相與走哭如失慈母

聶文炳字虎臣武昌人由副貢授臨縣令咸豐二年調知長
子縣性慈祥自奉儉約而喜宏獎勵農課士皆以實力行之
在臨尤多惠政所作勸民詩兩縣人多能誦之臨人有記政
略者稱其嘗署襄垣清積年未結之案團練鄉勇人效其力
撫集逃亡民恃安堵云云

曹光訓東安人由拔貢知屯留縣重士愛民廉潔仁恕興利
除弊士民悅服鄧國公藤縣進士繼曹任亦以惠稱卒於官
陸春圻字杏坡以畫名並有政聲

孫福清嘉善舉人知襄垣縣實心任事政無不舉修城垣立
義學保民興教練勇防堵創捐登雲會嘉惠藝林士民感德

姚潤之桐城人署襄垣縣癸丑八月粵逆竄入潞境距城僅三十里遊騎往來百姓震動潤之處以鎮靜率所練勇固守及賊東去土匪又肆劫掠立捕得重懲之境內始安去之日士民依依不舍遮道餞送數十里

彭翊侯官進士知壺關縣嚴毅有爲尤長聽斷事至立決癸丑黎潞之變民間警大擾翊終日危坐城樓示以鎮靜召耆老諭之令安堵如故在官甚有廉聲下車時值粟賤銀貴民困征輸爲酌定章程刊之石正供外無所私嘗署安邑富民李某以訟感其惠者也將行某陰持重金爲贖卻弗受

吳輝組懷甯舉人由榆社調知壺關縣以廉慎稱遇訟事必反覆曉譬不輕笞決株連者概置弗問鄉俗婦女多輕生每因小故自盡母家藉以居奇戚黨及胥吏因緣爲利往往有

死一婦而傾家蕩產者輝組力戒之以此興訟者概從未減其風漸息丁巳夏飛蝗至境躬禱於神爲文自責露宿風餐捕瘞甚力遂不爲災其年冬調汾陽去

賀松齡天津人咸豐三年以舉人知永甯州性明敏善折獄是非立決人皆畏服胥吏赴鄉按程限以時日違者重懲無敢犯者時議於臥羊諸山開礦松齡臚陳利害言極懇切事得寢州境不產木炭而向例府署供應由州民備價採買送交閩里苦累松齡爲據實請免丁艱去任後官至四川劍州知州

呂傳榮沐陽人知孝義縣吏治精明清廉自矢縣城垣傾圮多年旣蒞任倡議重修至今賴之

邢寶第字石農天津人知石樓縣精明強幹公正廉平值回

匪蠢動國勇防河勞勩甚至民恃以無恐

陳蘭第字淮生江西新城人咸豐初知澤州府寬平渾厚與民相安三年髮匪圍懷慶郡城戒嚴吏民惶恐他徒蘭第閉眷屬署中出榜安民民心乃定縣令李蕪防堵著績蘭第實左右之一時論者以爲能持大體焉

李蕪字小亭寶坻舉人知鳳臺縣時城郭久圯蕪竭力完繕踰年工竣而賊圍懷慶蕪躬至盃子城塞險隘備礮石募鄉勇千餘親爲訓練守備以固又延四鄉紳耆聯絡義民數萬聲勢大振賊聞風竄去全境獲安蕪在盃子城數十日晝夜巡守與士卒同甘苦人樂爲用賊退還署以積勞嘔血卒
襄贈朝議大夫崇祀名宦邑人悲感別立祠歲時報享焉
王佩玉字蓮溪寶甯舉人知陽城縣父元橋令襄垣嘉慶中

嘗因民變調署陽城咸豐五年侯井趙某之亂佩玉亦由襄
垣調補下車訊明各犯力除弊俗愛民禮士有父風著有不
爲齋詩集父子均祀賢侯祠

阮葵字桂山懷甯舉人知鳳臺縣時流賊李占標起獲嘉澶
魏之賊響應西來郡城大震葵延紳耆團四鄉之丁萬人拔
其尤者親爲訓練修太行盃子城天險置礮臺築牛馬牆又
增修小口壘土爲臺守備大固歷署永濟芮城並有政聲遷
代州知州卒於官

孫培金江蘇舉人咸豐二年知左雲縣軍興沿邊時有征調
供億絡繹培金規措得宜民不知擾甚感之

董慶咸大興人知左雲縣在官有治績提督張某兵變於甯
武北潰入縣境將入城慶咸單騎往諭之而危坐門闥以待

兵相視不敢犯民賴以安

王者詔字鳳諾濟陽進士知右玉縣廉正慈祥惻愍無華加
意文教多所造就士林以興學明倫頌之

常郁文山東舉人咸豐六年知榆社縣踰年去李國瀛陝人
也由進士繼任並以廉明著陋規裁革殆盡民感其惠

余紹昶奉新舉人署沁源縣癸丑八月粵匪自平陽東竄過
縣南境人情洶洶紹昶處以鎮靜有役訛言賊已逼城者立
擒治之眾帖然嗣因大兵追賊絡繹而至親住南鄉衛送出
境民家雞犬無恙合邑愛戴及去任士民誌其行實設位以
祀

孔廣熙字藹人濟源人知沁源縣嘗散給紡車廣延女師以
教紡織請裁沁陽驛貼濟以免羈候支應之累在官十餘年

政治民和凡邑中祠宇有就圯者無不設法修復具詳碑記
牟衍駮字麟石日照進士調署崞縣老成持重廉幹有爲前
任積案纍纍數日閒悉爲訊決時軍務倥傯車馬每苦羈候
親核驛簿探實後始差傳事集而民不擾及去士民相與攀
留祀之范公祠令晉二十餘年所歷若繁峙岳陽諸縣並有
惠政罷官客太原貧不能歸依寺僧以終

張世煇安州舉人咸豐元年知解州廉潔愛民政尚寬厚而
事上官特骨鯁未嘗迎合意旨事苟不便於民力持不爲卒
以此得謫歸

葉桂芬字小山青陽進士咸豐六年知解州嘗令翼城有善
政調知曲沃兵後詳請豁錢糧減差徭優卹殉難士民循聲
懋著在州值捻匪擾靈陝率民壯守南河復勸平芮並行鄉

團壯聲勢日夜周巡慰勞備至賊屢撲渡皆力拒之始竄東南尋復至守禦如初時河南居民避寇者號呼求渡察其非偽急遣舟往援全活無數州人爲作防河記勒諸石升潞安府知府卒於官所歷州縣並祀名宦

張懷堃字笠舫廣昌舉人知平陸縣潔己愛民寬猛相濟奉文團練他縣多斂錢募勇懷堃爲民團寓兵農商不費不擾擒匪犯陝率以防河與官軍犄角自芮及垣二百餘里列戍相望卒能扼其北竄陝州難民隔河呼救設法拯渡全活無算豫人勒石頌德焉後調安邑遷鳳臺卒祀名宦祠

李廷樟陸川進士咸豐十年由沁州知州調絳州在沁興孝弟敦禮讓專務以德化民有古循吏風及至州除詞訟陋規減錢糧火耗潔己愛民一如治沁時擒匪未靖團練壯丁防

堵津垣著有成績輯武經圖鏡一書分頒各鄉又因州城頽圯倡議興修踰二年工乃竣升平陽知府去其後丁卯之變城完可守民賴以無虞

廖堃元字子厚獨山人知絳縣有膽略多卓識時粵匪甫過民氣未靖下車卽操練丁壯爲防禦計年餘百廢俱舉作勸戒民歌各十條其徵糧令各鄉自呈限約罷差役追呼之擾聽訟則於堂皇設桶諭控狀者納之期三日隨拆隨審胥吏無能爲奸民甚便之公暇輒集諸生講論經史或吟詠爲娛其從戎紀實詩人多傳誦之

右咸豐年三十八人

又三人
附見

銀沆馬平人拔貢同治四年知徐溝縣光緒初復任精於吏治洩徐最久年高而不倦於勤嘗任岳陽十年省刑緩征甚

有循聲終潞安府同知

趙集成涇縣人同治四年知翼城縣縣協濟霍州驛軍興供億無時車馬困頓民苦之前令程炳昂議改輪驛費未果集成至乃與定約令霍人自僱車馬而縣歲解銀若干抵價時稱為便在官頗喜營建城垣學校以及祠宇皆葺治一新

黃傳紳字措斯秀山拔貢知汾西縣修葺城垣學校設條教正風俗蒞汾五載勤民之事與前令德方伯稱伯仲調陽城後改官陝西光緒三年秦晉大祲以蒲城令殉鄰邑饑匪之難

黃宜之字義門安徽人同治二年知臨晉縣下車周視城垣坍塌幾不能容足卽倡議興修舊以形家言塞南門云利民不利官及工就毅然開之曰官民一體也烏有民受福而殃

及於官者性急率真事不便雖令已出不憚追改遇棍徒擾害盡法重懲縣人以愛民若子疾惡如仇頌之

王焯字夔亭扶風人以拔貢署猗氏縣前令江因病久不視事案牘山積焯至一一清理每判決必在堂皇縱民觀聽剖斷如流無不服其平允縣人稱其初政明敏爲自來所未覩云性好學博極羣書著有山右金石志略十六卷歷署平陸陵川翼城文水補虞鄉縣卒於官

方戊昌淇縣人以貢由軍功補潞城知縣公廉有威勤政恤民鋤蠹役恤孤寒尤拳拳於獎進士類民以訟至一訊卽釋之案稍重不能驟結亦聽取保覆訊從無班房管押之事在任四年吏畏民懷調臨晉值丁戊大禱竭力賑恤民甚惠之以最擢忻州知州卒於官

宋用中漢陽舉人同治初知壺關縣有吏才善折獄雖爲所
左者悉服其明允擒匪窟晉集鄉民團防措置得宜事集而
民不擾

程汝濤字松泉六安人署襄垣縣平易近人明允果斷下車
後訪求利弊知鹿亭驛累及民卽量爲核減勒石裁革陋規
以其資興書院獎給生童士民頌之歷署永濟補陽高尋調
高平所至有循聲

羅嘉福字訂庭大興進士同治十年以侍讀出知汾州府方
正不阿潔己愛民大小政務皆躬親批發案無留贖循聲四
起時孝義某令詳解發冢重犯到案廉得其寃某令猶強辨
嘉福不少動卒緝獲真犯令服謝笑置之在郡數年爲汾陽
除積弊多端職滿以道員注選汾人爲立德政碑紀其事尤

緒三年晉省大饑嘉福時家居督辦賑務聞奏請來首協贊
多得其力次年卒

高崇基字紫峰靜海進士知介休縣廉謹樸誠盡心民事縣
多空糧道光中黃令樹寶議清丈未果崇基蒞任始設局定
按里丈量事集而民不擾以最調陽曲累遷至山西布政使
終廣西巡撫

鮑庠欽縣舉人知孝義縣廉節耿介忠厚和平舊時書院坍
塌已甚乃於倉巷街別購民居改建並設號舍爲童試之所
捐增經費惠被多士

范如璧字竹坪仁和人知石樓縣廉潔正直門無干謁政簡
刑清囹圄空虛一時稱循吏焉

張惠立字卓田滄州舉人知石樓縣練達老成公正無私縣

賭風頗熾盡法嚴懲博徒悉斂迹尤精聽斷民以訟至立即
訊決無能遁飾調壺關去

劉榛甯鄉知縣防河之役巡緝甚嚴而遇河西難民必竭力
拯之陝人有惠溢鄰封之頌

朱焜字小舟甯鄉知縣廉潔愛民力除積弊民頌之一時有
朱青天之稱有言志詩二章婦孺能傳誦之在官再閱月遭
憂歸暨有德政碑

龍汝霖字皞臣攸縣人知高平縣博學工文裕幹濟才爲政
以教養爲先縣舊有練更百餘人半皆游手汝霖盡裁之而
嚴行保甲立鄉團法戢省民錢萬緡修復書院公暇輒親講
授城外各鄉均設義學廣至一百二十餘所俗素知績紡試
裁桑稱土宜乃益課民廣植不則有罰迄今蠶絲之利甲於

三晉性淡於榮利在官不廢著述職滿卽乞疾歸著有高平縣志詩文各集

程豫字立齋陝西山陽人同治七年由解州知州升大同府性沈毅有幹略甫下車卽懸賞緝盜窮治窩黨時率團勇親巡邊塞合郡肅然凡聽訟不踰三日悉論報可息者令自和解捐廉增書院經費設普濟堂散粥施衣以恤貧民威惠大行調太原府累遷按察使終四川布政使其宰徐溝時叛將宋景詩由陝東竄沿途劫掠及抵縣豫迎見責以大義奉約東惟謹有數勇強取民物立縛至軍斬以徇遂帖然民心大安壽陽相方里居聞而嘉之還朝與五臺徐中丞合疏密薦由縣令不十年擢至方面時有攝孟縣令王珠蠟者濟甯人亦以潰勇過境調度有方爲孟人所稱云

雲茂濟字華川文昌進士由翰林改芮城知縣調知崞縣廉
明幹練決獄如神整飭差務立車馬局以濟驛站又倡立賓
興局捐錢萬緡爲鄉會試資由是寒畯皆奮志於學蒞任二
年卒於官貧不能歸嗔人資送還里附祀范公祠

姚慶布安嶽桐城人同治二年知保德州寬仁慈惠政簡刑
輕在官十年囹圄空虛回匪擾陝西府谷諸縣籌辦河防妥
善周密民賴以安

金福增字葆卿清苑人以諸生從軍保擢知縣同治三年擢
長子縣所練勇爲太行諸邑最陝回倡亂調補河曲七年正
月賊陷神木其冬復犯府谷兩次撲渡皆爲福增所卻會嵩
武軍至賊敗走河防解嚴在官修葺城垣礮卡建立書院義
學以其暇纂修邑乘政績卓著河西之長灘鎮本套部地而

縣所兼轄者也爲賊所躡厚撫恤之

陶汝霖高澗進士知安邑縣蒞政嚴明令行禁止勤於課士教養兼施治聲甚著卒於官嘗署榮河值陝事方殷猝有潰勇數千自邵陽東渡聞之立馳往其將宋景詩令兵士露刀以待自云奉帥令東還責令供億汝霖不爲動以無檄直責之戒勿妄動啟聲歸而閉門登陴率民嚴守兵至求入弗許強之厲聲曰吾頭可斷門不能啟也宋氣懾卽日北行在縣界無敢肆掠者

楊豐紳大興進士同治四年知芮城縣廉正自持殷勤課士年餘以鯁直忤上官罷時議惜之

鄭逢辛山陰人知芮城縣廉隅自矢剛斷有爲卻供應減僕從奸吏蠶役望而生畏調署鄉甯亦著循聲

陳懷璋字玉章醴泉舉人同治元年知絳縣平易近民凡所設施必博諮詳講允愜輿情於書院經費鄉試川資時時出金助給嘗遇寇災往驗卽捐廉數百緡振之六年捻匪擾及整嚴武備城賴保全蒞任十年政績著聞

譚廷榮字春陵山陰人由襄陵調知河津縣時值防河民苦供億調度有方不至重困丁卯冬捻逆之變城中食不足糴米以濟捐廉五千金事定未嘗取償於民平時片言折獄寬猛相濟及卒軍民謳思其在襄陵捐增書院經費折車價便霍驛協濟亦有聲稱云

王國寶吳縣舉人同治六年任垣曲縣到官未及旬日賊莽至夜半燬南門而入城陷赴四聖廟焚火藥自焚死事聞賜恤世襲雲騎尉

林鍾字靖仲閩縣進士知聞喜縣其爲政善鉤距終日坐堂
皇來訴者雖無呈詞亦受之常數言而決不直而來控者立
扑責不復追呼對質取撫軍李所頒堂規立石兩楹閒胥役
無敢舞文執法以訟受財者一時有神君之頌歲餘以艱歸
士民垂涕餞送者自邑至夏縣界纍纍不絕至閩以哀毀卒

右同治年二十七人

石成峰字子軒臨桂進士光緒二年由翰林改知翼城縣值
歲大祲倡捐俸金多方賑濟不辭勞瘁儉約自持訟至立決
下鄉必儉從役惟恐擾民調孟縣去士民泣送之
楊定遠由舉人檢發署曲沃縣逢歲歉煮粥食民全活無算
革除雜麪行稅並酌減各行冗規以勤勞致疾卒於官返櫬
之日哭祭送喪者雖乞兒亦流涕云

于鍾德字宣臣昆明進士署汾西縣值旱饑縣被災尤劇地故瘠人尠蓋藏竭力籌捐得二千金設局分賑日以不足出所貸友人數百金益之而自飯脫粟或竟雜糠覈不以爲苦也是冬無雪死者日眾明年春復不雨鍾德時已奉文補沁源令矣一日登樓四望白骨蔽目自傷爲令無狀大慟因之致疾會大府頒賑金至縣手籍其數力疾付局紳諄諄以善拯予遺爲念歸而自盡其妻王氏亦不食死事聞

特旨旌卹予世襲縣人建祠祀之

瑞斌字治庭滿洲鑲白旗人光緒二年知汾州府值大稔督辦賑務親臨屬邑查勘務令實惠均霑其後議均通省差徭尤銳意籌辦積勞五閱月之久始得就緒而疾作矣將卒惟以不及終事爲憾其懇懇肫篤實心愛民如此

白廣械字子俊直隸通州人知臨縣明敏練達事至立決蒞任期年政平訟理遇歲饑審核戶籍嚴治盜劫集紳富多方籌捐以待普賑踰年民困漸蘇暑月因事下鄉積勞不支道中偶遘卒於與中縣人哀之爲卜地營葬歲時祀焉

陳世綸青縣人以拔貢歷官榮河夏縣潞城萬泉陽曲諸縣署忻州升授絳州才識明敏遇事有權略爲令屢經寇警外禦內撫民賴以安光緒三四年間州屬薦饑道殣相望辦理賑務事必躬親不遑寢食積勞成疾卒先是三界莊匪民乘機聚眾初猶強糴漸至劫奪不逞之徒互相觀望將並起州中一日數驚世綸不動聲色集勇役掩捕之斬二人以徇餘黨分別遣散用是合境安堵如故而賑務得以次第舉行歿之日州人感泣鳩資建祠以祀

袁希璋字琢堂安岳進士署河津縣值大祲饑民肆掠將爲亂乃分路緝捕獲數十盜鞫研首從戮十人地方始靖至辦賑務所夕憂勞談及流亡情形輒泣下自奉甚儉而爲民造救饑藥收養嬰孩助僚屬喪葬爲卜子夏後裔置祀田傾囊捐助無所吝也積勞成疾卒於官貧無以治喪同官借紳民厚賻之始得歸

右光緒年七人